



BiH priprema šesti potprojekat Državnog projekta stambenog zbrinjavanja u okviru Regionalnog stambenog programa

Regionalni stambeni program koji finansira međunarodna zajednica, prije svih, Evropska unija, kao najveći donator sa učešćem od oko 230 miliona eura, te Sjedinjene Američke Države, Italija, Njemačka, Norveška, Švicarska, Danska, Turska i druge zemalje donatori, uz podršku UNHCR-a, OSCE-a i Razvojne banke Vijeća Evrope (CEB) u punom je zamahu.

Ovaj višegodišnji program provodi se u nizu potprojekata za koje se pripremaju posebni projektni prijedlozi (aplikacije) i o čijem finansiranju odlučuje Skupština donatora Fonda RSP.

Do sada su Bosni i Hercegovini odobrena sredstva u iznosu od 48,6 miliona eura za provedbu pet potprojekata u okviru kojih će se obnoviti oko 2.000 individualnih stambenih objekata za potrebe povratka izbjeglih i raseljenih osoba, te izgraditi 512 stanova za potrebe lokalne integracije raseljenih osoba i izbjeglica iz R Hrvatske u BiH, kao i reintegracije povratnika.

Na osnovu dostupnih sredstava u Fondu RSP, Bosna i Hercegovina je pozvana da pripremi aplikaciju za šesti potprojekat DPSZ. Vrijednost donatorskih sredstava za potprojekat BiH6 iznosi 14,8 miliona eura što uz domaću kontribuciju od 2,7 miliona eura čini ukupnu vrijednost projekta od oko 17,5 miliona eura.

Bosna i Hercegovina je za Vodeću instituciju Državnog projekta stambenog zbrinjavanja imenovala Ministarstvo za ljudska prava i izbjeglice BiH, a implementaciju potprojekata povjerila je Federalnom ministarstvu raseljenih osoba i izbjeglica, Ministarstvu za izbjeglice i raseljena lica Republike Srpske, te Odjelu za izbjeglice, raseljena osobe i stambena pitanja Vlade Brčko Distrikta BiH.

Vodeća institucija i jedinice za implementaciju definirali su polazne osnove za BiH6, na osnovu čega je Ministarstvo za ljudska prava i izbjeglice BiH, u saradnji sa partnerima iz resornih entitetskih ministarstava i uz podršku lokalnih zajednica, u obavezi blagovremeno pripremiti projektnu aplikaciju.

U ovom potprojektu planirana je re/konstrukcija 235 porodičnih kuća na području RS i 365 stanova u višestambenim zgradama, od kojih 245 na području Federacije BiH i 120 na području RS. Stanovi će ostati u trajnom vlasništvu lokalnih zajednica koje obezbijavaju građevinski opremljeno zemljište i priključke na infrastrukturu i služiće za stambeno zbrinjavanje najugroženijih raseljenih osoba i povratnika po modelu neprofitnog socijalnog stanovanja.

U organizaciji Federalnog ministarstva raseljenih osoba i izbjeglica, 10. januara 2018. godine u Sarajevu održan je radno-konstultativni sastanak za nominiranje potencijalnih lokaliteta za izgradnju višestambenih zgrada na području Federacije BiH. Sastanku su pored organizatora i predstavnika Ministarstva za ljudska prava i izbjeglice prisustvovali predstavnici 21 općina i gradova iz FBiH, potvrđujući na taj način interes, potrebu i spremnost lokalnih zajednica da sarađuju na pripremi potprojektne aplikacije za BiH6, koja će do kraja januara 2018. godine biti poslana putem CEB-a i predstavljena donatorima. Skupština donatora će o prijedlogu Bosne i Hercegovine odlučivati polovinom ove godine, a implementacija potprojekta BiH6 predviđena je do kraja 2020. godine.

Regionalni stambeni program finansira i podržava međunarodna zajednica



Regionalni stambeni program (RSP) ima za cilj da obezbijedi trajna rješenja za stambeno zbrinjavanje raseljenih lica nastalih nakon sukoba na teritoriji bivše Jugoslavije u periodu od 1991-1995. godine. RSP sprovode Bosna i Hercegovina, Hrvatska, Crna Gora i Srbija, a finansira najvećim dijelom međunarodna donatorska zajednica. Glavni donator je Evropska Unija. Ostali donatori su SAD, Njemačka, Italija, Norveška, Švajcarska, Danska, Turska, Luksemburg, Kipar, Rumunija, Republika Češka, Republika Slovačka i Mađarska.